

**Joiibe 2**  
S. Marie dai Agnui

**Vinars 3**  
S. Asprenât

**Sabide 4**  
S. Zuan Vianney

**Domenie 5**  
S. Marie de Nêf

**Lunis 6**  
Trasfigurazion dal Signôr

**Martars 7**  
S. Gaetan

**Miercus 8**  
S. Domeni di Gusmàn

**Il timp**  
Si sbassin lis temperaduris.

**Il proverbi**  
Tiere nere e fâs bon gran;  
tiere blancje e fâs muri di fan.

**Lis voris dal mès**  
No stait a dismenteâsi di gjavâ vie  
lis plantis sejadis e lis jerbatis;  
rarit lis plantis cressudis masse.



**Il soreli**  
Ai 2 al jeve aes 5.50  
e al va a mont aes 20.36.



**La lune**  
Ai 4 ultin curat.

## lis GNOVIS

### PREMI «MERIT FURLAN»

#### Cuatri campions

Silvana Schiavi Fachin (studis e ricercjîs), Angelo Floramo (culture), Enzo Gandin (emigrazion e solidarjetât) e Dino Zoff (premi speciâl pe cariere) a son stâts sielzûts par cjapâ il premi «Merit Furlan» 2018. Il ricognossiment public, inmaneât de Comunitât culinâr e dal Comun di Rivis Darcjan, al smire di valorizâ il patrimoni natif di umanitât che al salte fûr de Patrie. Un zuri di pueste al à tamesât i candidâts proponûts di Comuns, di clapis e di personis singulis. La cerimonie de premiazion, rivade a la XXXV edizion, e je bielzà stabilide par vinars ai 7 di Setembar, a 18 li dal cjistiel di Darcjan Disore.

### «AVOSTANIS» 2018

#### Ricuart dal poete Cappello

«Avostanis» 2018 a onorin e a ricuardin il poete Pierluigi Cappello, che al à stât un dai protagoniscj de rassegne culturâl rivade a la XXVII edizion, li dai «Colonos» di Vilecjasse di Listize. I 10 apontaments di chest an a saran programâts dai 31 di Lui ai 11 di Setembar, cu la direzion artistiche di Federico Rossi. Lis seradis dedicadis a Cappello a colaran ai 31 di Lui, ai 3 di Avost e ai 11 di Setembar. Ai 17 di Avost, al torne a Vilecjasse Philippe Daverio par fevelâ di Europe. Fra i protagoniscj di «Avostanis» 2018, ancje il «Duo Anshman», Dj Tubet, il «Grup Majakovskij» e Franco Fabbro. Il program complet si pues burîlu fûr tal lûc internet [www.colonos.it](http://www.colonos.it) e par «facebook».

### PROGRAM PE RI-IDENTIFICAZION

#### Zoventût e Diaspore

Brugnere, Cjanive, Daçan, Frisanc, Glemone, Gorc, Marian, Pasiàn, Povafri, Praturlon, Ramussiel, Raussêt, Spilimberc, Udin e Vilotte a son i paîs di divignince dai 23 zovins de Diaspore, invidâts tal Friûl occidental di «Efasce» pal program culturâl «Young Adults». La delegazion, che e restarà te Patrie fin a la fin dal mès di Lui, e je componude di 9 Brasilians, di 7 Canadês, di 4 Argjentins, di 2 Americanis dai Stâts Unîts e di un Spagnûl. Intant de permanence, i ospits a àn frecuentât lezionis universitariis a Pordenon e a àn visitât la capitâl dal Friûl occidental, Aquilee, Barcis, Triest e la Scuele Mosaiciscj di Spilimberc, guidâts di Albarosa Catelan e companâts di un grop di students universitaris e di ex students dal Istitût «Leopardi-Majorana».

## Dal ultin scandai «Ispra-Snpa» sul «consum di teren» a rivin dâts spaventevui



Il tierç liston de autostrade A4 al dissiparà 114 etars di teren, 15 etars di lôr ducj tal comun di Porpêt.

# La nestre Patrie artificiâl

**A** LA BARBE dai befei e des promessis, impretebil, il Friûl al continue a tudâ tiere, savoltant il teritori in mût di pierdi une risorse fondamentâl pes sôs funzions vitâls e pai servizis ecosistemics che e garantîs.

L'ultin chivali sul consum spropositât di tiere, che al menace l'avignî de Patrie e dai furlans des etis avignî, al à sunât ai 17 di Lui, cuant che «Ispra» (Istitût superiôr pe protezion e la ricercje ambientâl) e «Snpa» (Sisteme statâl pe protezion dal ambient) a àn publicât la edizion dal scandai «Consumo di suolo, dinamiche territoriali e servizi ecosistemics».

La Region Friûl-V. J. e fâs une figurate, comparint dibot in ogni setôr dal scandai te part des classificis destinadis ai teritoris che a stan piês de medie taliane complessive, che e je za vilient e spaventevul. Il document si pues leîlu par tabelle, discjamantlu a la direzion eletroniche: [http://www.isprambiente.gov.it/public\\_files/ConsumoSuolo2018/Rapporto\\_Consumo\\_Suolo\\_2018.pdf](http://www.isprambiente.gov.it/public_files/ConsumoSuolo2018/Rapporto_Consumo_Suolo_2018.pdf).

Dal Friûl, si cjacare te seconde part, dedicade a «Câs significatîfs e contescj regionâl», dulà che a comparissin un paragraf di pueste e la schede regionâl. Si fevele ancje tal paragraf sui «Senaris pal avignî e normis regionâls», dulà che i principis declarâts a son laudâts, ma il confront cu la realtât al sgrisule... Te rassegne fotografiche dai câs talians plui impressionants, po, a jentrin i cantîrs par slargjâ la autostrade (114 etars disvinidrits), il centri logjistic di Pordenon (9 etars), il pòl intermodâl di Roncjis di Monfalcon (8 etars), un centri comerciâl a Martignâ e un parc fotovoltaic a Monfalcon.

«Vie pal 2017 – al premet il scandai «Ispra-Snpa» –, in 15 Regjons al à stât superât il 5% dal consum di teren, cul valôr percentuâl plui alt in Lombardia (che e tocje dibot il 13%), tal Venet (12,35%) e in Campane (10,36%). Subit daûr, a rivin Emilie-Romagne, Friûl-V. J., Lazio, Pulie e Ligurie, cun valôrs comprendûts fra il 8 e il 10%».

Il cuint puest fra lis piês Regjons, il Friûl-V. J. sal merte in grazie di chescj indicadôrs: 70 mil 571 etars di teren tudât, vie

pal 2017, cuntun consum percentuâl dal 8,92% (là che dal 2016 al jere dal 8,88%) e cuntune incressite dal 0,41%, che e corispunt a 291 etars in plui fra 2016 e 2017. Te classifiche dai teritoris dulà che l'aument percentuâl di superficie artificiâl al è stât piês, la Regjon e risulde seconde, superade dome dal Venet (+0,50%).

Il consum di teren al tire a dilunc ancje tes zonis protezudis. In Friûl e a Triest, an passât, a son stâts pierdûts 12 mil 313 etars di cuestas e di areis tor atôr di lâts e di aghis (8,78%, là che la Italie si è fermade al 8,04%) e altris 2 mil 717 etars di teritoris cun altris formis di protezion stabilidîs dal Codîc dai Bens culturâi e dai paisaç (9,12%, a pet dal 6,08% talian). In cheste classifiche scandalose, la percentuâl regionâl e je miôr di chê taliane (0,45% cuntri dal 0,85%) dome par chel che al inten a la distruzion (fermade a 191 etars) di terrens di montagne pupilâts.

Il scandai al devente, tant e tant, plui impressionant cuant che al tamese il consum di terentes zonis plui pericolosis, par vie dai slacs e des menacis idraulichis, e al spauris cuant che si ri-

ve tal cjapitul sul «Consum di teren dentri des zonis cun pericolositât sismiche».

«Il teren tes areis cun pericolositât sismiche alte e une vore alte – a pandin «Ispra» e «Snpa» – al ven consumât cuntune percentuâl dal 7,4% tes areis cun pericolositât sismiche alte e dal 4,8% tes areis cun pericolositât sismiche vore alte, par un total di 869 mil e 35 etars di superficie tudade, che al corispunt al 37,7% dal total des areis artificiais talianis.

Cjalant la storie dal Friûl e memoreant la tragedie dal taromot dal 1976, si varès di scrupulâ che, al mancual in chest câs, chenti, cussience e sintiment a podaressin vè frenât il disio. Il confront, invece, al è indaûr vilient: teren consumât in areis cun pericolositât sismiche alte: Friul-V. J. 8,8%, Italie 7,4%; teren consumât in areis cun pericolositât sismiche vore alte: Friul-V. J. 4,9%, Italie 4,8%; incressite percentuâl in areis cun pericolositât sismiche alte: Friul-V. J. 0,3, Italie 0,2%; incressite percentuâl in areis cun pericolositât sismiche vore alte: Friul-V. J. 0,2%, Italie 0,2%.

MARIO ZILI

## PERAULIS in DISMENTIE

• par cure di MARIO MARTINIS •

### VE

int. = ecco, guarda, vedi  
(dal verbo viôdi “vedere”)  
Ve chi pan e salam!  
Ecco qui pane e salame!

### VEDRAN

s.m. = celibe  
(dal latino veteranus “vecchio, anziano”)  
Cemût mai sono tancj vedrans tal nestri paîs?  
Come mai ci sono tanti celibi nel nostro paese?

### VENC

s.m. = vimine  
(dal latino vincium, da vincire “cingere, collegare, incatenare, fasciare, stringere, circondare”)  
Chê frutine si stuarç come un venc.  
Quella bambina si contorce come un vimine.

### VENCJARIE

s.f. = ceppo del giunco  
(da vincire “cingere, collegare, incatenare, fasciare, stringere, circondare”)  
Lassin stâ lis vencjariis dassen il riul.  
Lasciamo stare i ceppi dei giunchi presso il rivo.

### VERGON

s.m. = panione  
(dal latino virga “virgulto; stelo; talea; panione”, di etimologia incerta)  
Zuan al continue a meti i vergons par cjapâ i franzei. Ce schifôs!  
Giovanni continua a mettere i panioni per catturare i fringuelli.  
Che schifoso!

### VERMENE

s.f. = vermena, virgulto  
(dal latino verbena, utilizzato al plurale; voce panromanza, da un determinato periodo storico è nome generico di erbe o fronde di carattere sacro come l'alloro, e l'olivo)  
Chest an tal broili al è plen di vermenis.  
Quest'anno il podere è colmo di virgulti.